



Siverth K. Heilmann  
Atassut

UPA 2024/119  
16. maj 2024

**Qanoq iliornikkut tusagassiortunngorusunneq annertusarsinnaanersoq pillugu apeqquaqaat aallaavigalugu Inatsisartunut oqallisissiasatut siunnersuut.**

(Inatsisartunut ilaasortaq Aqqalu C. Jerimiassen, Atassut)

Siullermik oqallissarisooq Aqqalu C. Jerimiassen qujaffigerusuppara saqqummiussaanut, imatullu Atassut sinnerlugu naatsumik oqaaseqassaanga.

Nalunngilarput atorfiit aalajangersimasut inuttalersugassat amerlisarniaraangatsigit ilinniarfimmik pilersitsiinnarnikkut tamanna anguneqarsinnaanngitsoq. Siullermik soqutiginninneq pigineqartariaqarpoq, taavalu atorfimmi atukkat pitsaasusariaqarlutik. Politikikkullu iliuuseqarfigisinnaasagut annertunngikkaluartut suli iliuuseqarsinnaavugut.

Uagullu maani inersuarmitugut tamavitta, immaqa maaniittuni nutaajunerpaat suli misilissimannikkaluarat, tusagassiorfinnut nalunaarusioqattaarnikuuvugut politikikkut oqariartutigit ersersikkumallugit. Aamma tamangajatta misigisareersimavarput tusagassiortuniit piumasarinngisatsinnik iluarinngisatsinnik saqqummiunneqarneq. Sorliugaluarpalluunniit tusagassiortut pisariaqartippagut - tamatta.

Isumaqarpunga annerpaamik tusagassiortut kiffaanngissuseqartariaqartut. Uagummi politikkeritut aqunniartussaannngilarput suut tusagassiissutigineqassanersut. Aamma aqunniartussaannngilarput. Pitsaanerpaamilli tusagassiisoqartassappat amerlasuunik pikkorissunillu tusagassiortoqartariaqarpugut. Tusagassiortut eqeersimaartut pikkorissut. Isumaqarpungalu siunnersuuteqartutuut, uagut politikkeritut tusagassiortunik isiginnittariaasitsinniit aamma iliuuseqarsinnaasugut.

Tusagassiortunngorniarnermullu ilinniarfik aamma tulluarsaqqinneqarsinnaavoq, nunatsinni pissutsinut tulluarsakkamik imaqarnerulersillugu. Assersuutigalugumi piffissaq atorneqartarpoq dokumentariliornermut ilinniarneq. Tamanna imminermini nuannerunavissoraluartoq, soorlumi nunatsinni dokumentariliortunik suli iluamik takussaasoqanngitsoq. Tulluarsarsinnaasut taamaattut eqqumaffiginiarsinnaavagut.

Pisariaqarsorinarporlu tusagassiortunngorniartut sivilisunerusumik praktikkersinnaanissaat. Tassanimigooq tusagassiortunngorniartut ilikkagaqarnerpaasaramik. Minnerunngitsumillu



ilinniarnerminni politikkikkut annerusumik sammisaqartarnissaat kissaatiginarpoq, politikkikkut tusagassiinissamut, politikkerinillu apersuisarnissamut piareeqqaneruniassagamik.

Nalunngilarpullu nunatsinni ikittunnguugatta tusagassiortut isornartorsiuissagaangata arlaatigut ilaqquttagut, suleqatikugut, ikinngutigut, allatullu nalunngisagut kalluartussaallugit. Tamanna annerusumik susinnaangikkaluaripput suliffiat ataqqiinnarsinnaavarput.

Naggataatigullu eqqaaginnarsinnaavara, kalaallit pikkorinnerulertariaqarpugut aamma tusagassiortunik tatiginninnerulluta. Massakkummi soorlu facebookikkut saqqummiussat naak arlaata isummersuutigiinnaralarai, allaat tusagassiortuniit upperinerulersoorsinnaasaratsigit. Taamaalilluni eqqunngitsut upperineqalersoorsinnaasarlutik. Kiisalu inuusuttunut kaammattuutigiinnarsinnaavara tusagassiortunngorniaqqullugit, tassaniippormi aamma inuiaqatigiinni pissaanerup sisamaa.

Siunnersuuteqartumut qujanaq.